

ARTIKEL 6(1): DOKUMENT VAN IDENTIFIKASIE: WET OP VEEDIEFSTAL, NR 57 VAN 1959: AFSLAERS

Dokument van Identifikasie:

Artikel 6(6) van die Wet bepaal dat:

“Iemand wat aan ’n afslaer, agent of markmeester vee lewer om verkoop of op ’n ander wyse van die hand gesit te word, word, by die toepassing van hierdie artikel, geag daardie vee aan bedoelde afslaer, agent of markmeester van die hand te gesit het.”

Die gevolg is dat ’n persoon wat vee aan ’n afslaer lewer vir die verkoop of andersins van die hand sit daarvan, ’n artikel 6(1) Dokument van Identifikasie aan sodanige afslaer moet voorsien. Artikel 6(1) van die Wet bepaal dat:

“Enige persoon (met inbegrip van ’n afslaer, agent of markmeester) wat vee aan iemand anders verkoop, verruil, gee of op ’n ander wyse van die hand sit, moet ten tyde van die aflewering aan daardie ander persoon van die vee aldus verkoop, verruil, gegee of van die hand gesit, aan daardie ander persoon ’n dokument (hieronder ’n dokument van identifikasie genoem) verstrek—

(a) waarin vermeld word—

(i) sy volle naam en adres en, indien die vee ten behoeve van iemand anders verkoop, verruil, gegee of van die hand gesit is, ook die naam en adres van daardie ander persoon;

(ii) sodanige besonderhede met betrekking tot daardie vee as wat ingevolge ’n kragtens artikel sestien uitgevaardigde regulasie daarin vermeld moet word;

(a) Die ras of soort;

(b) die getal;

(c) die brand-, oor-, tatoeër- en ander identifikasiemerk (as daar is); en

(d) indien die vee nie soos vermeld in paragraaf (c) gemerk is nie of die vermelde merk nie ingevolge enige wet geregistreer is nie -

(i) die geslag en getal van elke geslag; en

(ii) die kleur daarvan. [Let wel: SUB-REGULASIE (d) SAL SLEGS VAN TOEPASSING WEES AS DIE BETROKKE VEE NIE GEMERK HOEF TE WEES INGEVOLGE DIE BEPALINGS VAN DIE WET OP DIE IDENTIFIKASIE VAN DIERE, NR 6 VAN 2002, NIE.] (Eie invoeging)'

(iii) die volle naam en adres van die persoon aan wie die vee verkoop, verruil, gegee of van die hand gesit is;

(iv) die datum waarop die vee verkoop, verruil, gegee of van die hand gesit is;

(b) waarby gesertifiseer word dat bedoelde vee sy eiendom is of dat hy behoorlik deur

die eienaar daarvan gemagtig is om daarvoor te beskik.”

Alhoewel artikel 1 van die Wet “vee” definieer as: **“enige perd, muil, esel, bul, koei, os, vers, kalf, skaap, bok, vark, pluimvee, volstruis wat ’n huisdier is, wild wat huisdiere is of die karkas of gedeelte van die karkas van enige sodanige vee”**, bepaal die Regulasies gepubliseer in Goewermentskennisgewing Nr. R. 1370 van 22 Mei 1992, dat ’n artikel 6(1) Dokument van Identifikasie, slegs uitgereik hoef te word ten opsigte van die volgende: **“Enige bul, koei, os, vers, kalf, skaap, bok of volstruis wat ’n huisdier is, of die karkas of gedeelte van die karkas ...”**

Artikel 6(2) bepaal dat:

“Niemand aan wie vee verkoop, verruil, gegee of op ’n ander wyse van die hand gesit is en aan wie ingevolge sub-artikel (1) ’n dokument van identifikasie verstrekk moet word, mag aflewering van daardie vee aanvaar sonder om bedoelde dokument ten tyde van aflewering te verkry nie

terwyl artikel 6(3) vereis dat:

“Iemand aan wie ingevolge sub-artikel (1) ’n dokument van identifikasie verstrekk is, moet dit vir ’n tydperk van minstens een jaar in sy besit hou.”

Die bewoording van artikel 6(1) stel dit verder onomwonde dat: **“Enige persoon (met inbegrip van ’n afslaer, agent of markmeester) ...”** (Eie onderstreping), wat: **“... vee aan iemand anders verkoop, verruil, gee of op ’n ander wyse van die hand sit ...”**, ’n artikel 6(1) Dokument van Identifikasie aan sodanige persoon moet uitreik.

Wat misdrywe in hierdie verband betref, naamlik:

- waar vee deur ’n afslaer ontvang word sonder dat ’n **volledig** voltooide artikel 6(1) Dokument van Identifikasie, ten tye van die ontvangs van die vee, deur die afslaer verkry word; en / of
- waar vee deur die afslaer verkoop, verruil, gegee of op ’n ander wyse van die hand gesit word, sonder dat die afslaer ’n volledig voltooide artikel 6(1) Dokument van Identifikasie, aan sodanige persoon uitreik en verstrekk ten tye van die oorhandiging van die vee,

word u aandag gevestig op die bepalinge van artikel 6(5)(a), wat as volg lees:

“Iemand wat ’n bepaling van hierdie artikel oortree of versuim om daaraan te voldoen; is aan ’n misdryf skuldig.”

ARTIKEL 8 - VERWYDERINGSERTIFIKAAT:

Artikel 8(1) van die Wet, plaas ’n **direkte verbod** op ’n persoon om **“vee of produkte waarvan hy nie die eienaar is nie, op of langs ’n publieke pad dryf, vervoer of transporteer”** sonder dat hy / sy in besit is van ’n verwyderingsertifikaat. Sodanige verwyderingsertifikaat word in terme van die

bepalings van die laasgemelde artikel, deur die: **“eienaar van daardie vee ... of die behoorlik gemagtigde agent van die eienaar”** (Eie onderstreping) uitgereik. Enige persoon wat beweer dat hy / sy die “behoorlik gemagtigde agent” van die eienaar is, dra die bewyslas om aan te toon dat hy / sy inderdaad `n **“agent”** van die eienaar is, en verder dat hy / sy **“behoorlik gemagtig”** was, deur die eienaar, om namens die eienaar op te tree.

Die begrip: “eienaar”, word vir doeleindes van hierdie artikel uitgebrei deur artikel 8(9) om die volgende in te sluit:

“By die toepassing van subartikels (1), (2) en ... beteken „eienaar” ook iemand wat vee of produkte verkry het uit hoofde van `n koopoooreenkoms ingevolge waarvan so iemand nie die eienaar van bedoelde vee of produkte word bloot op grond van die lewering aan hom van bedoelde vee of produkte nie.”

Die eienaar se verantwoordelikheid om `n verwyderingsertifikaat uit te reik, word verder beklemtoon deur artikel 8(2), wat as volg bepaal:

“Niemand mag vee of produkte waarvan hy die eienaar is deur `n ander persoon op of langs `n publieke pad laat dryf, vervoer of transporteer nie of hom toelaat om dit te doen nie, sonder om aan hom `n verwyderingsertifikaat wat hy ingevolge subartikel (1) moet besit, te verstrek.”

Die volledige artikel 8(1) word vir u gerief aangehaal:

“Vee of produkte op of langs publieke paaie gedryf, vervoer of getransporteer.—(1) Niemand mag vee of produkte waarvan hy nie die eienaar is nie, op of langs `n publieke pad dryf, vervoer of transporteer nie tensy hy in besit is van `n sertifikaat (hieronder `n verwyderingsertifikaat genoem) wat deur die eienaar van daardie vee of produkte of die behoorlik gemagtigde agent van die eienaar aan hom uitgereik is, waarin vermeld word—

- (a) die naam en adres van die persoon wat die sertifikaat uitgereik het;**
- (b) die naam en adres van die eienaar van daardie vee of produkte;**
- (c) sodanige besonderhede met betrekking tot daardie vee of produkte as wat ingevolge `n kragtens artikel *sestien* uitgevaardigde regulasie daarin vermeld moet word;**

- (a) Met betrekking tot vee -**
 - (i) die ras of soort;**
 - (ii) die getal;**
 - (iii) die brand-, oor-, tatoeëer- en ander identifikasiemerk (as daar is); en**
 - (iv) indien die vee nie soos vermeld in paragraaf (iii) gemerk is nie of die vermelde merk nie ingevolge enige wet geregistreer is nie -**
 - (aa) die geslag en getal van elke geslag; en**
 - (bb) die kleur daarvan. [Let wel: SUB-REGULASIE (iii) SAL SLEGS VAN TOEPASSING WEES AS DIE BETROKKE VEE NIE GEMERK HOEF TE WEES INGEVOLGE DIE BEPALINGS VAN DIE WET OP DIE IDENTIFIKASIE VAN DIERE, NR 6 VAN 2002, NIE.] (Eie invoeging)**
- (b) Met betrekking tot produkte -**
 - (i) die soort;**
 - (ii) die getal, hoeveelheid of gewig;**
 - (iii) die identifikasiemerk en nommer (as daar is); en**
 - (iv) indien in `n houer of houers verpak -**

- (aa) die getal houers; en
- (bb) die identifikasiemerk en nommer van elke houer (as daar is).'

- (d) die plek waarvandaan en plek waarheen daardie vee of produkte gedryf, vervoer of getranspoteer word;
- (e) die naam van die drywer, vervoerder of transporteerder;
- (f) die datum van uitreiking daarvan; en
- (g) indien van toepassing, die registrasienommer, model en fabriek van die voertuig waarmee die vee of produkte vervoer of getranspoteer word:

Met dien verstande dat die bepalings van hierdie sub-artikel nie van toepassing is nie ten opsigte van vee of produkte wat met die toestemming van die eienaar daarvan of sy behoorlik gemagtigde agent op of langs 'n deel van 'n publieke pad wat gaan oor grond wat aan die eienaar of agent behoort of wat deur hom geokkupeer word, gedryf, vervoer of getranspoteer word."

Die Regulasies gepubliseer in Goewermentskennisgewing Nr. R. 1370 van 22 Mei 1992, bepaal dat 'n artikel 8(1) Verwyderingsertifikaat, slegs uitgereik hoef te word ten opsigte van die volgende: **"Enige bul, koei, os, vers, kalf, skaap, bok of volstruis wat 'n huisdier is, of die karkas of gedeelte van die karkas of die hele of enige gedeelte van velle, huide of horings van sodanige vee, en enige wol, bokhaar of volstruisvere."**

Rakende toepaslike misdrywe word u verwys na die bepalings van artikel 8(8)(a), (c) en (d), wat as volg lees:

"Iemand wat—

- (a) 'n bepaling van hierdie artikel oortree of versuim om daaraan te voldoen;
- (c) in 'n verwyderingsertifikaat ... opsetlik 'n valse verklaring maak; of
- (d) valslik verklaar dat hy die eienaar is van vee of produkte wat op of langs 'n publieke pad deur hom gedryf, vervoer of getranspoteer word,

is aan 'n misdryf skuldig."

U word daarop gewys dat die strafregtelike vervolging van 'n regs persoon, of 'n lid van 'n vereniging, deur artikel 332 van die Strafproseswet, Nr 51 van 1977, gereguleer word, sou u enige vrae / onsekerhede in dié verband sou hê.

Die inhoud van hierdie skrywe het ten doel om die verstaan van die na-verwysde wetgewing te vergemaklik. U is steeds verantwoordelik om uself van die bepalings van alle relevante wetgewing, ens. te vergewis.